

Auta visita en Chasa Rumantscha

Samuel Schmid s'ha laschà preschentar la LR

■ (anr/fa) Samuel Schmid, il president da la confederaziun, ha visità la Chasa Rumantscha a Cuira. La LR ha profità da la chaschun per l'infurmar davart sia lavur e sias finamiras. «Samuel Schmid ans ha fatg ina visita betg annunziada, spontana», ha ditg Vincent Augustin, il president da la Lia rumantscha (LR), mardi passà. En sasez era vegnì il president da la confederaziun en la chapitala grischuna a chaschun da la seduta da la cumissiun dal cussegl dals chantuns per la politica da segirezza: Cunquai ch'il president da quella cumissiun, il cusseglier dals chantuns Theo Maissen, ha demissiunà avevan ins organisà ina pitschna festa d'engraziament. «Tantpli essan nus stads fitg satisfatgs da l'interess mussà per la Rumantschia», ha punctuà Augustin.

Menziunà er l'istanza da la LR

Las collavuraturas ed ils collavuratur han preschentà a Schmid las differentas lavurs che la LR presta a favor dal rumantsch. «Nus n'avain dentant er betg manchentà da skizzar in maletg realistic da la situaziun actuala dal rumantsch», ha menziunà Gion Antoni Derungs, il secretari general da la LR, «sco er rinvià a noss istanza inoltrada a confederaziun e chantun per in ulteriur sustegn finanziel.» Quel è en vista a la novas perspectivas per la Ruman-



Samuel Schmid e Vincent Augustin (da san.) en Chasa Rumantscha.

FOTO F. ANDRY

tschia da damaun tenor la suprastanza da la LR necessari per pudair construir vinavant sin ils fundaments dals ultims 20 onns.

«Er sch'i mancan ils fritgs concrets»

Ch'els hajan pudì constatar ch'il cusseglier federal haja, sco insatgi che derivia d'in chantun biling, enclatga per ils problems d'ina minoritad linguistica sco il

rumantsch, ha ditg Vincent Augustin sunter la visita da Samuel Schmid. «Er sche sia visita nun ha manà nagin fritg concret è quai stada ina bun'ocasiun per cultivar il contact persunal cun il president da la confederaziun», ha cuntinuà Augustin, «jau sun persvas che baud u tard vegn sia visita a Cuira ad esser en l'ina u l'autra maniera fritgavla per nus Rumantschs.»

«La simpatia per il rumantsch na manca»

CUN SAMUEL SCHMID HA DISCURRÌ
FLURIN ANDRY / ANR

Tge effect vegn ad avair la nova lescha da linguas per la Rumantschia?

Samuel Schmid: Sco ch'igl è enconuschent nun aveva vulì lantschar il cussegl federal sez la lescha da linguas, causa che nus ans eran conscients ch'i na stattan displaschavelmain betg a disposiziun daplirs meds finanzials. Il sustegn federal da las linguas, surtut dal rumantsch, ristga da vegnir uschia sut pressiuin, forsa schizunt scursani. Perquai eran nus da l'avis ch'i saja meglier da mantegnair il status quo che da ristgar scursanidas. La lescha sezza è uss en elavuraziun, qua na poss jau dir nagut concret, tge che quella portia finalmain a la Ruman-

tschia. Segir è unicamain che las pretaisas che vegnian fatgas a la lescha ston er esser finanziablas. La lingua rumantscha giuda ina gronda simpatia en tut la Svizra, e segirmain er en il cussegl federal, ma noss meds èn sco ditg limitads. Quai è en sasez noss problem: I nun è ina dumonda da memia pauca simpatia u sustegn, mabain dals meds che ans stattan a disposiziun.

Tge pussaivladads ha il president da la confederaziun d'influenzar il sustegn per l'istanza da la Lia rumantscha, inoltrada durant il december passà?

Jau mez hai decis da vegnir a far ina visita a la LR, causa che jau era gia a Cuira, per pudair discurre cun ils

pertutgads sez e ma laschar infurmar tge che capita qua en la Chasa Rumantscha. Las bleras activitads da la LR per tegnair en vita il rumantsch m'han fatg impressiuin. Questa lavur merita segirmain gronda appreziaziun. Ella furma la basa per obtegnair er en avegnir il sustegn federal.

Tge impurtanza dais Vos a la quarta lingua svizra, al mantegniment da quella?

La Svizra è quadrilingua, la plurilinguitad è in caracteristicum per noss pajais. Questa diversitad linguistica ed er culturala è absolutamain degna da vegnir mantegnida. Perquai vulain nus ans stentar da sustegnair er il rumantsch nua che quai ans è be pussaivel.